

Regional News Unit AIR Aizawl
Saturday, November 09, 2024
Time - 7:30 -7:40Hrs

REGIONAL NEWS BULLETIN

HEADLINES (MORNING)

- Mizoram People Forum khawmpui Aizawla neihah an hmalakna avangin inthlan boruak leh candidate ruat chungchang boruak a tha thawkhat viau a, a lang lo lam chanchin erawh chu a la lungawi thlak chuang lutuk lo ni a hriat a nih thu tarlan a ni.
- Lunglei Mizoram Polytechnic chu an ram luah man pek loh avângin an building zawng zawng khâr sak turin court in thu pek a chhuah.
- Prime minister Narendra Modia chuan Central-a NDA sawrkar leh Maharastra state-a Mahayuti sawrkar chuan mi retheite chawikanna turin theihtawp a chhuah a ti.
- Congress hruaitu leh Lok Sabha Opposition leader Rahul Gandhi chuan BJP chu tlangmite lak atanga tui, ngaw leh ram chhuhsak tumah a puh.



MPF

Mizoram People Forum (MPF) chuan Annual General Conference vawi 17 na nimina Aizawl Vanapa Hall a neihah MPF Hmalakna avangin inthlan boruak leh candidate ruat chungchang boruak a tha thawkhat viau a, a lang lo lam chanchin erawh chu a la lungawi thlak chuang lutuk lo ni a hriat a nih thu tarlan a ni.

MPF President Rev. Vanlalnghaka kaihhruai an pawl khawmpuiah hian MPF hnathawh thlir letna leh hmalam thlirna hun a hman a ni a, 'A chhe lai siam that' tih thupui hmang a thu a sawinaah MPF President hlui Rev. Lalzuithanga chuan, Sum leh pai hmanga vote zawn, inlei leh inhralh te, engemaw thil intiam angte sawi a ni thin a. Heng thilah hian politician te leh candidate te aimahin mipui lam hi an diklo zawk nite pawhin sawi a ni thin a ti a, Candidate te leh an campaigner te atanga engemaw therhlo beiseiin an lo hmachhawn a, 'min pek loh chuan' emaw 'min tihsak dawn chuan' titein an lo hmachhawn thinte chu siam that ngaihna tilangtu a ni a ti a. Siamthat a nih lohva tun ang zela a kal chuan tun aia nasa zawk harsatna hrang hrang - dan pawisak lohnate, hlemhletnate, tualthahnate, tharum thawnate leh rethei leh hausa karte a zau zel ang a, Kohhran nun pawh a tha lo zawngin nasa takin a nghawng zel dawn a ni," a ti.

Synod Moderator hlui chuan Mizoram khawpui, Aizawl chauh ni lovin, thingtlang kilkhawr tak takah pawh tleirawl atanga puitling thleng zu leh ruihtheih thilin a tihbuai sawi tur a tam hle tih a sawi a. Kohhran inkhawmte pawh a member atanga chhut chuan khawi Kohhran mah hi inkhawm an tha lo a.

Hetiàng zela a kal anih chuan inkhawm tur an awm lo mai ang tih pawh a hlauhawm a ti a, hei vang hian chhياتna lai leh tlakbalna lai siam that tur hi tam tak a awm a ni a ti bawk.

Rev. Lalzuithanga chuan ram siamthat hna thawk tur hian Chhungkua, Politics leh Kohhran a pawimawh thu a sawi a, ram leh hnam siamtha turin inrelbawlna tha (Good Governance) chu ram mamawh a nih thu a sawi. He thupui 'A chhe lai siam that' tih hmang hian sawihona neih a ni bawk.



CM

Mizoram Secretariat Service Association Conference vawi 19 na Aizawla Administrative Training Institute Auditorium a neih chu Chief Minister Pu Lalduhoman a hmanpui a.

Kalphung tha zawk duha lo au thin ten sawrkar in mipuite tana rawngbawlna tha leh zual siam tumin hmalakna a nei ta nual a. Hengah te hian sawrkar hnathawkten tha taka an thawhpui a beisei a ti a. Hnathawktu tha an awm theih nan department tinah Service Review Committee an dintir bawk a. Hnathawk thei lo emaw thawk tlak lo te dap chhuak a, a tul anga dan anga insingsak kan tum a ni. Sawrkar hnathawkte service quality a that hian kan ram quality a tha dawn a ni, a ti.

Information technology a thang chak em em a, hei hian nunphung a thlak nasa a. Sawrkar pawhin hei hi hman tangkai a tum a ti a. Mipuite tana awlsamna thlen zawng zel a kal a duh a. Sawrkar hnathawkten technology thang zel mila a inbuatsaih ve a ngai tih a hrereng dawn a ni a ti.

Pawl leh kohhran lamah sawrkar hnathawkte an inhman nasat lutuk hian nitin hnain a tuar thei a. Inhman dan tawk thiam a tha a ti a. Thawhpuite kep ngai reng, mahni thawhna hmuna hmuh harsa tak an ni ang tih a hlauhawm a. Mahni hna hi mahni rawngbawl nana Pathian hunna a ni a, ngaipawimawh ber tur a ni, a ti.

Reilote sawrkarna an chelh chhungin Service Association hote a hmu kim deuh vek tawh a. Service hrang hrang inkarah inelna leh inepna a nasa hle tih a hmu ni a sawiin hei hi tihdal a duh a ti a. Thawhho vek an ni a, an hnain a tuar ang tih a hlauhawm a ni a ti. Heiu bakah hian Dept hotuten an hnuaiia thawkte hmakhua an ngaituah tawk lo thin nia a hriat thu sawi bawkin an hnuaiia hnathawk hnuaihning lam te hmathamna ngaihthah loh tur a ni a, post ruak hnawhkhah kawngah pawh a hnuailam a kawrawng lutuk a. Hei hian nakin zelah harsatna a siam thei a ni, a ti.

MSSA President Pi Betsy Zothanpari Sailo chuan Mizoram Secretariat Service Association chu kum 2004 a ding tan, Mizoram Ministerial Service atanga group A chin te unit hrang anga kal ta an nih thu a tarlang a. MSSA hian tunah hian sanctioned post 260 neiin Officers member 261 an awm mek a ni.



LUNGLEI POLYTECHNIC

Lunglei Mizoram Polytechnic chu an ram luah man pek loh avângin an building zawng zawng khâr sak turin court in thu pek a chhuah.

Mizoram Polytechnic Lunglei, Hrangchalkawn bula awm chu hun rei tawh tak atanga a ram neitu Pu Vanlaldawngliana chuan Court a a khin hnu thla engmawzat hnuah Court hian sorkar hnenah pawh thil awmzia- a hriattir a, hunrei tak a ngaihchân hnuah pawh an hmun luah man hi an ngaihsak chuan loh avângin ningani khan Pi Lalthansiami Hnamte Civil Judge Senior Division Lunglei chuan Mizoram Polytechnic Lunglei building zawng zawng khar sak turin thupêk a chhuah a ni .

Thu dawnna in a tarlan danin Mizoram Polytechnic Lunglei ram luah man an pek loh zawng zawng zat hi cheng nuai 98 & 5,033 a tling a ni.



PM VISHWAKARMA

Sorkar laipui scheme PM Vishwakarma hnuai hmalakna peng pawimawh tak pakhat - thing mistiri training chhuak mi 61 hnenah nimin khan Certificate hlan a ni a. He hunah hian DC Pu Paul L.Khuman a hmanpui.

DC chuan Mizoram District 11 zingah training chhuak te hnenah certificate sem thei hmasa ber an ni tih a sawi a, Serchhip District mipuite, DC Office a thawktute leh Serchhip District a he scheme kalpuitu Medhavi Foundation te thahnemngaihna vang a ni, a ti a, tun dinhmunah District te zinga hmahruaitu an ni thei chu a lawmawmin a chhuanawm tak zet a ni, a ti. PM Vishwakarma hi mipui nawlpui thleng phak hmalakna a ni a, theihtawp chhuah chuan mi chawi kangtu a ni thei a ni, a ti.

Serchhip District a PM Vishwakarma hmalakna chungchang sawi zautu Dr C.Vanlalchhanhimi, Sub Deputy Commissioner chuan Serchhip District chung VC zawng zawng te he scheme hnuai an inziahlul tawh thu te, dilna thehluttu mi 2582 awm tawhin District 11 zingah hma an hruai mek thu a sawi a. Dilna lut te hi Nodal Department - Commerce and Industries chuan lo thlifimin DC Office in a pawmpui hnuah state ah thehlul leh thin a ni, a ti.

Kan corr report lo ngaithla zui ang.



SHC

Sinlung Hills Council-a sorkarna siam tura an inpeih thu MNF leh HPC ® Legislature Party member ten Aizawl District Commissioner hnenah an thlen a,

A hma thei ang bera sorkar an siam theihna tura hmalak sak turin an ngen nghal a ni.

Sinlung Hills Council MNF & HPC (R) Member tling thar mi 7 te lawmna hun chu nimin khan MNF Party Office Mizo Hnam Run ah neih a ni a, MNF Sr. Vice President Dr. R Lalthangliana chuan thusawiin he hnehna hi MNF chakna vang ngawr ngawr ni lovin, Mipuite hnehna a ni a ti a. Mipui Party, Mipui ta, Mipuite tana ding thin MNF party hnehna an chantir ta a ni, a ti.

ZPM General Headquarters Office a PAC Extended Meeting nimina neih chuan Sinlung Hills Council inthlanna neih zawh tak thlirletin Council huamchhunga Seat pali lai an la chu lawmawm an tih thu sawiin, ZPM Party leh HPC Party te tang dunin sum leh therhlo hmanga vote a zawng ve lo a ni an ti.

Congress Party chuan Congress Bhavan-ah ‘Friday Political Session’ an hmang a, Sinlung Hills Council Member thar Pu Lalrawngbawla, Khawlian bial lawmpuina hun hman nghal a ni.

He hunah hian MPCC President Pu Lal Thanzara chuan thu sawi in, Sinlung Hills Council inthlan atang hian Congress an inlungrual in an inthuruual a, nasa takin hma an sawn a ni tih a langchiang a. Council member pakhat chauh a tling chung hian Sinlung Hills Council pum puia vote tla zawng zawng ah sawrkar ta MNF chu vote 185 chiahin an pha lova, sawkar lai ZPM ten Congress Party aiin vote 403 in an hmu tlem zawk a ni a ti.

Pu Lal Thanzara chuan Mizorama Small leh Mini Hydel Project engemaw zat chu ZPM sorkarin Delhi mihausa Gundana hnenah an enkawl turin hlan a tum a, hmalakna a kal zel tih thu a dawng ni a sawiin kawlpheha MW 12 pechhuak thei Serlui hian kum 10 chhunga a hlep chu cheng vbc 78 leh nuai 14 vel a ni a, heti chunga outsource an tum chhan hi hriat a chakawm hle a ni, a ti a, Gundan Green Pvt Ltd hnena hlan a nih hun chuan kum khat chhunga (2023-2024) a power hmuhchhuah atanga sawrkarin Gundana hnena a pek tur chu cheng vbc 12 leh nuai 28 lai a ni, a ti.

Hetianga sawrkarin midang hnena a hlan hian sawrkarin heng Hydel Project te enkawltu a a chhawr PE Staff te hi engtin nge an awm zel dawn tih pawh ngaihtuah tham a ni a ti bawk.



AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te ngaihthlak leh chhiar theiha dah a ni.



CAMPAIGN

Jharkhand leh Maharashtra Assembly inthlan atan Political Party ten campaign ngawrh takin an nei mek. Party tin hruaituten hmun hrang hrang vantlang inkhawm leh kawngzawh an nei a. Prime Minister Narendra Modia leh BJP senior leader Narendra Modia chuan nimin khan Dhule leh Nashik ah thu a sawi a. Central-a NDA sawrkar leh Maharashtra state-a Mahayuti sawrkar chuan mi retheite chawikanna turin theihtawp a chhuah a ti a. Ram hmasawnaah hmeichhiate dinhmun chawikan chu a pawimawh hle tih sawiin Maharashtra-a hmeichhis nuai 50 chuan Ujjwala Yojana hnuaiah LPG connection an nei tawh a ni a ti.

(Byte)

Pu Modia chuan sawrkarin hmeichhiate hamthatna turin tan a la nasa tih sawiin India hmasawnaah hei hi tih makmawh a ni a ti a. Maharashtra state hmasawna chak taka kal mek chu chhonzawm a ni ang a ti bawk.

Hetihlai hian NCP (SP) hotupa Sharad Pawar chuan vawiin khan Wardha ah thu a sawi a. NCP (SP) hruaitu Supria Sule pawh Pune ah a campaign a ni. Maharashtra-ah hian Assembly bial 288 ah tun thla ni 20 hian vote thlak a ni ang.



MAOIST KILLED

Chhatisgarh-a Usur-Basaguda-Pamed area ah Maoist pathum kahhlum an ni. Security Force te chuan nimin khan Bijapur district-ah hian Maoist te lakah beihpui an thlak a. Maoist pathumte ruang hi hmuh tawh niin beihpui hi thlak chhunzawm mek a ni.



CONGRESS

Congress hruaitu leh Lok Sabha Opposition leader Rahul Gandhi chuan BJP chu tlangmite lak atanga tui, ngaw leh ram chhuhsak tumah a puh. Rahul Gandhi Jharkhand-a Simdega-a a campaign-ah he thu hi sawiin tun tum Assembly inthlan atana inbeihna chu ram danpui humhim duhtu leh tihchhiat tumtute inkar a ni a ti.

Hetihlai hian BJP hruaitu Himanta Biswa Sarma chuan Rahul Gandhi chu Hindu te thendarh tumah a puh a ni. Puan tawh angin Jharkhand-ah hian inthlan thawh hniha neih tur a ni a. Tun thla ni 13 leh ni 20 ah vote thlak a ni ang.

